

Pahang salur RM1.2 juta untuk program celik al-Quran OKU penglihatan

Oleh [Asrol Awang](#) - April 25, 2024 @ 3:08pm
bhnews@bh.com.my



Pengerusi Jawatankuasa Kebajikan Masyarakat, Pembangunan Wanita dan Keluarga Pahang, Datuk Sabariah Saidan ketika melancarkan Projek Al-Quran bagi OKU Penglihatan peringkat Pahang di Kuantan. - Foto NSTP/Asrol Awang

KUANTAN: Kerajaan negeri menyalurkan peruntukan RM1.2 juta melalui Jabatan Kebajikan Masyarakat (JKM) bagi Program Celik al-Quran Braille untuk golongan orang kurang upaya (OKU) penglihatan beragama Islam.

Pengerusi Jawatankuasa Kebajikan Masyarakat, Pembangunan Wanita dan Keluarga Pahang, Datuk Sabariah Saidan, berkata peruntukan itu termasuk pembelian al-Quran Braille untuk memudahkan golongan berkenaan membaca.

Katanya, selain itu, peruntukan itu turut membabitkan kemudahan dan penganjuran latihan yang bersesuaian kepada golongan itu yang dikendalikan Universiti Islam Pahang Sultan Ahmad Shah (UnIPSAS).

"Oleh itu, UnIPSAS diharap mengerakkan aktiviti berbentuk kursus dan latihan untuk meningkatkan jumlah guru al-Quran Braille yang berkemahiran di negeri ini.

"Saya juga mengharapkan UnIPSAS dapat melaksanakan dengan lebih giat promosi di seluruh Pahang supaya semua OKU penglihatan dapat mengambil bahagian dalam pengajian al-Quran," katanya.

Sabariah berkata demikian pada Majlis Pelancaran Projek Al-Quran bagi OKU Penglihatan peringkat Pahang di sini hari ini.

Hadir sama, Naib Canselor, Prof Datuk Dr Mohd Zawawi Zainal Abidin dan Pengarah Jabatan Kebajikan Masyarakat (JKM) Pahang, Khairul Amri Ahmad.

Beliau berkata, UnIPSAS mengorak langkah ke hadapan berbanding universiti lain dengan menyediakan kepakaran, modul dan penyelidikan berkaitan OKU.

"Hal ini menunjukkan UnIPSAS mempunyai kemampuan tinggi dan sentiasa bersedia memartabatkan ilmu dalam kalangan OKU.

"Ia sekali gus membuktikan kekurangan fizikal bukan menjadi penghalang kepada golongan ini untuk berjaya dalam bidang akademik dan pembinaan sahsiah," katanya.